

## “ARLeF e Udinese Calcio insiemi par un altri campionât”

ARLeF e Udinese Calcio insiemi par un altri campionât. Ogni an, cuant che l’Istât al va viers la fin, si tornin a jemplâ lis sentis dal stadi, al tache un gnûf campionât, siôr di sperancis pe squadre e pai tifôs. Un apontament che si rinove, tant che chel jenfri la Agenzie Regionâl pe Lenghe Furlane e la societât Udinese Calcio: ancje chest an o sin daûr a meti in program une schirie di iniziatis par dâ ae lenghe furlane simpri

plui visibilitât ancje tal mont dal balon. Come te stagjon passade, o cjatarês un articul curât de nestre Agenzie in ogni numar dal Udinese Magazine distribuît in ocasion des partidis in cjase. Il compit de ARLeF al è chel di promovi e di supuartâ l’ûs de lenghe furlane in ducj i setôrs de vite cotidiane, ancje tal sport, e cui che al ven al stadi

lu sa ben che i tifôs a fevelin la lenghe dal puest. Aromai za di cualchi an o vin scomençât a colaborâ cu la societât Udinese Calcio, che e à crodût te impuartance di fevelâ ai tifôs doprant ancje la lôr lenghe.

In chest campionât us compagnarin fevelant in ogni numar dal gjornâl di un argument diferent, cun aprofondiments no dome su la lenghe furlane, ma ancje su chês altris lenghis

mancul cognossudis de Europe, sul leam jenfri sport e rivendicazions identitariis, su la culture des minorancis e sui progjets e lis ativitâts de Agenzie. O sperin di stiçâ la curiositât dai tifôs tal aprofondî la cognossince de lôr lenghe, o di invoîa chei che no le fevelin a imparâle. La nestre idee di promovion de lenghe furlane e je in clâf europeane. Cussi tant che l’Udin che al incuintre sul cjamp scuadris di inaltrò, ancje nô o volin confrontâsi cun chês altris realtâts di minorance in Italie e tal forest, parcè che al è cul confront che si cres: nus plâs pensâ a une lenghe furlane simpri in moviment, vierte al rapuart cun altris realtâts e culturis. O sperin dilunc di cheste stagjon di vê un stadi simpri plui plurilengâl, dulà che il furlan al è ancjemò plui presint: sui strissons dai tifôs, tai còrs de curve, ma ancje tes campagnis di abonament e tal materiâl promovionâl de squadre.

Bon campionât a ducj!

**Lorenzo Fabbro**

*President de ARLeF*

